

Bin ch' 'l sangh ant le venne a v' beuja,
 Aspetè d' esse bin anformà;
 Prchè d' vote podria ariveve
 D' incontrene quaicun ancor pes
 Dlo ch' i v' abia savù racontève,
 E peui feve burlè ancor apres.

Frammento inedito sui pregi del Piemonte.

CANZONE LV.

I son pa pr deslodè
 Gnun pais, ch' i seu ch' ai n' è
 Ch' a l' an d' merit singolar;
 Ma son nen an tut del par.
 Quand 'l mond a fuss un moton,
 Coust pais a saria 'l rognon.
 La colina, ch' a j' è a Turin,
 A par giust un belissim giardin,
 Pienna d' fruta, fior e vis,
 Ch' a fan d' vin, da fè vni gris;
 E dle fabriche piantà,
 Ch' a fario una sità.
 J' è dij fium e dij torent
 Pr bagnè abundantement
 I giardin, j' ort e i prà,
 Fin i camp, e ancor le strà;
 Tant ch' ariva mach quaich an
 Ch' la suitina fa del dan.
 A j' è 'l Po, coul fium famos,
 Fra tanfi aitri 'l pi grandios,
 Che con d' barche e gros barcon
 A somministra d' provision
 Con bel comod a bon cont,
 E gran util al Piemont.

I castei e le sità,
 I vilagi e le borgià
 A son spesse e piene d' gent
 Com' a son an boca i dent;
 E da vive ai n' è pr tuit,
 Pochi stan mach a pan suit.
 Dla povraja ancor ai n' è,
 I lo peus pa nen neghè,
 Ma com' 'l proverbì a dis.
 Tut 'l mond a l' è pais,
 Ai n' è stait, e ai na sarà
 Fin ch' 'l mond a sussistrà.
 Ma s' a j' è d' mendicità,
 A j' è dco dla carità,
 Ch' a rimedia a cousti guai
 Con d' ritir e d' ospidai;
 E peui tanti agiut sforsos
 Pr socore i bisognos.
 Che bele opere ch' ai son
 D' artirè cativ e bon,
 Tant i malavi com' i san!
 E le lassite ch' a s' fan
 Pr tal fin e tal oget,
 A produo un bon efet.
 Ma a j' è una cosa da esaltè,
 Venta di ch' i forestè
 Son bin vist dai Piemonteis,
 Tuit amabil e corteis,
 E portà, pr quant mi seu,
 Au favor ant nessun leu.
 Le risere del pais
 D' ordinari fan tant ris,
 Ch' a na god nen solament
 La nassion, ma tanta gent,
 Ch' a so temp (com' tuti san)
 Ven cariene da lontan.

Lin e cauna l'è abundant,
 E semnà da mila cant,
 Pr fè d'teila, corde e fil,
 Lavor gros e d'coul sutil;
 Coust racolt, s'a va pr drit,
 A rend ancor un bel profit.

Un comersi 'l pi fiori
 D'ogni cosa ch' i vorì;
 Bele fere e bei marcà
 Ai so di determinà,
 E dal gran concurs dla gent
 Tut a l' ha so smaltiment.

Ch' a sio bon, ch' a sio gram,
 A son dco del sangh d' Adam;
 Pr mi i tenno an gran concet.
 Professandie ogni rispet.
 Ma pr coust (com' tuti san)
 A l'è degn d'esse sovràn.

La Giustissia a l' ha j' eui duvert,
 E i Ministr a son espert;
 Tuti quanti son atent
 Pr 'l bon regolament;
 D'una gran capacità,
 Bon maneg e probità.

Rispetabil' l' è 'l Senat,
 Com' tuit j' atri Magistrat;
 I m' antendo coul d' Turin,
 D' un gran spirit sovrafin;
 Ch' a l' ha dait dle decision
 D' una gran amirassion.

S' i guardomo 'l militar,
 L' è un piasì particolar
 Vede coula bela gent;
 Regiment pr regiment,
 Tuti bin amaestrà
 Pr la guera, e desgagià;

D' un coragi da lion,
 Ch' a s' batrio contra 'l tron;
 Ferm e fort e pien d' onor,
 Ch' 'l combate ai fa nen por;
 A lasran la pel pi tost
 Ch' arivè a chitè so post.
 J' è dij bei e dij bon fòrt,
 Tuit an stat, e già a bon port,
 Pr difeisa del pais,
 Da l' insidie dl' inimis,
 Ch' ai daran bin da studiè,
 S' ai van sot a bustichè.

*Questa canzone non fu terminata dall' Autore. —
 Notisi che questo frammento fu scritto alcuni
 anni dopo la metà del secolo scorso.*

FINE DELLE CANZONI.